

Na osnovu Zakona o udruženjima i fondacijama ("Službene novine Federacije BiH", broj 45/02) Osnivačka skupština Udruženja matematičara Unsko – sanskog kantona na svojoj sjednici održanoj u Bihaću 21.6.2013. godine donosi

STATUT

UDRUŽENJA MATEMATIČARA UNSKO – SANSKOG KANTONA

I – OPĆE ODREDBE

Član 1.

Ovim Statutom se, u skladu sa Zakonom, uređuje se: naziv, sjedište, pečat, znak, područje djelovanja, javnost rada, ciljevi, djelatnost, članstvo, unutrašnja organizacija, zastupanje, predstavljanje, udruživanje s drugim udruženjima, sticanje i raspolaganje imovinom, prestanak rada Udruženja matematičara Unsko – sanskog kantona (u daljem tekstu Udruženje), te druga pitanja od značaja za organizaciju i rad Udruženja.

Član 2.

- (1) Puni naziv Udruženja je: Udruženje matematičara Unsko – sanskog kantona.
- (2) Skraćeni naziv Udruženja: UMUSK.
- (3) Udruženje u kontaktu s međunarodnim subjektima koristi i naziv na engleskom jeziku koji glasi: Una – Sana Mathematical Society.

Član 3.

- (1) Sjedište Udruženja je u Bihaću, Luke Marjanovića bb.
- (2) Odluku o promjeni sjedišta donosi Predsjedništvo.
- (3) Udruženje djeluje na području Unsko – sanskog kantona.

Član 4.

Udruženje ima znak koji predstavljaju stilizirana slova UMUSK i slovo pi.

Član 5.

- (1) Pečat udruženja je okruglog oblika, promjera 50mm.
- (2) Uz rub pečata je na bosanskom jeziku, latinicom, kružno ispisan tekst Udruženje matematičara Unsko – sanskog kantona.
- (3) U sredini pečata se nalazi znak Udruženja.

Član 6.

(1) Rad Udruženja je javan. Javnost rada Udruženje ostvaruje javnim održavanjem sjednica Skupštine i predsjedništva, predstavljanjem izvještaja o radu i finansijskom poslovanju članovima Udruženja, obezbjeđivanjem prava članovima da po svim razmatranim pitanjima javno iznose svoje mišljenje, kritike i prijedloge za rješavanje, pravovremenim i istinitim informiranjem članstva i šire javnosti o svojim djelatnostima putem sredstava javnog informiranja i web stranice, plakatima, oglasima i na druge načine u skladu s ovim Statutom.

(2) U cilju što potpunijeg ostvarivanja javnosti rada Udruženje može izdavati svoje glasilo u skladu s propisima o javnom informiranju. Odluku o izdavanju glasila donosi Skupština.

II – CILJEVI I DJELATNOST

Član 7.

Udruženje je strukovno, nevladino, neprofitno, dobrovoljno, vanstranačko udruženje građana kojima je zajednički cilj unapređivanje i promicanje svih aspekata matematičkih nauka, nastave matematike na svim razinama i općenito vaspitno – obrazovne i društvene djelatnosti u području matematike i srodnih disciplina, primjene matematike u drugim disciplinama, kao i unapređivanje položaja matematičara i matematike u cjelini.

Član 8.

Ostvarivanje ciljeva iz prethodnog člana, Udruženje ostvaruje kroz sljedeće aktivnosti:

- organiziranje naučnih i stručnih skupova,
- organiziranje naučnih i stručnih predavanja,
- organiziranje seminara, savjetovanja, diskusija i radionica,
- sudjelovanje u naučnim i stručnim skupovima i predavanjima, seminarima, savjetovanjima, diskusijama i radionicama,
- izdavanje časopisa i drugih publikacija,
- organiziranje i sudjelovanje u raznim oblicima rada s učenicima i studentima (ljetne i zimske škole, seminari, radionice, i sl.),
- pripremanje učenika i studenata za takmičenja na svim nivoima,
- organiziranje takmičenja i sudjelovanje u takmičenjima učenika i studenata na svim nivoima,
- saradnja sa srodnim udruženjima i institucijama u zemlji i inostranstvu,
- članstvo u međunarodnim matematičkim asocijacijama i sl.
- saradnja u izradi i analiziranje nastavnih planova i programa za matematiku i matematičku grupu predmeta, kao i srodne predmete i oblasti, za sve vrste i nivoe obrazovanja,
- saradnja u izradi i analiziranje didaktičke opreme za matematiku i matematičku grupu predmeta za sve vrste i nivoe obrazovanja,
- sudjelovanje u izradi i analizi udžbenika, priručnika i drugih didaktičkih materijala za matematiku, matematičku grupu predmeta i srodne predmete i oblasti, te davanje stručnih mišljenja o njihovim vrijednostima,

- saradnja s aktivima predavača matematike i srodnih predmeta i oblasti u osnovnim i srednjim školama,
- formiranje posebnih komisija i sekcija,
- realizacija stručnih, didaktičkih, naučnih i istraživačkih projekata u oblasti matematike, matematičke grupe predmeta i srodnih predmeta i oblasti,
- obavljanje i drugih poslova koji doprinose ostvarivanju ciljeva Udruženja utvrđenih ovim Statutom.

Član 9.

(1) Udruženje može radi ostvarivanja svojih statutarnih ciljeva i djelatnosti osnivati subjekte za privrednu i drugu djelatnost pod uvjetima utvrđenim zakonom.

(2) Odluku o osnivanju iz prethodnog stava donosi Skupština.

III – ČLANSTVO

Član 10.

(1) Članstvo u Udruženju je redovno i počasno.

(2) Redovni članovi Udruženja mogu biti svi državljani Bosne i Hercegovine koji su: doktori ili magistri matematičkih ili srodnih nauka, nastavnici i saradnici koji realizuju neke matematičke discipline na univerzitetima u Bosni i Hercegovini ili inostranstvu, profesori matematike u srednjim školama, nastavnici matematike u osnovnim školama, predavači matematike i srodnih predmeta u osnovnim i srednjim školama, lica koja su završila I i/ili II stepen studija matematike ili srodnog studija, kao i studenti takvih studija.

(3) Redovnim članom Udruženja mogu postati i svi ostali građani Bosne i Hercegovine koji prihvataju ciljeve i Statut Udruženja i brinu za njihovo ostvarivanje.

(4) Redovnim članom Udruženja mogu postati i učenici koji pokazuju izuzetan interes za matematiku i ostvaruju zapažene rezultate iz matematike.

(5) Redovnim članom Udruženja mogu postati i strana lica koja imaju stalni ili privremeni boravak u Bosni i Hercegovini, pod istim uvjetima kao državljani Bosne i Hercegovine.

(6) Redovni članovi Udruženja mogu biti fakulteti, škole, preduzeća, udruženja, kao i sve druge pravne osobe koje djeluju kao naučne i/ili vaspitno – obrazovne institucije u području matematike i srodnih oblasti a koje imaju interes da ostvaruju saradnju sa Udruženjem. Pravne osobe koje su redovni članovi mogu imenovati svog predstavnika u Skupštinu Udruženja.

(7) Počasni članovi Udruženja mogu postati sva fizička i pravna lica, uz njihovu suglasnost, koja značajno doprinose širenju i unapređivanju matematike i njenih primjena te koja su svojim djelovanjem posebno doprinijeli razvoju Udruženja. Počasni članovi ne plaćaju članarinu.

Član 11.

(1) Članstvo u Udruženju je dobrovoljno.

(2) Redovnim članom Udruženja postaju lica koja prihvate ciljeve i Statut Udruženja i potpišu pristupnicu.

- (3) Osnivači stiču svojstvo redovnog člana Udruženja danom registracije Udruženja.
- (4) O prijemu u članstvo odlučuje Predsjedništvo.
- (5) Odluku o proglašenju počasnog člana donosi Skupština na prijedlog Predsjedništva.

Član 12.

Članovi Udruženja imaju sljedeća prava i obaveze:

- da aktivno učestvuju u ostvarivanju ciljeva Udruženja,
- da biraju i budu birani u organe Udruženja,
- da budu redovno i blagovremeno obavještavani o aktivnostima Udruženja,
- da sudjeluju na sastancima organa Udruženja i učestvuju u donošenju odluka,
- da daju inicijative za sazivanje Skupštine, izmjene i dopune Statuta, izbora i opoziva organa Udruženja,
- da koriste sredstva Udruženja za naučni i istraživački rad u skladu s odlukama organa Udruženja,
- da propagiraju publikacije Udruženja,
- da sarađuju s ostalim članovima Udruženja,
- da čuvaju i podižu ugled Udruženja,
- da izdanja Udruženja kupuju uz popust,
- da redovno plaćaju članarinu,
- da ostvaruju druga prava utvrđena Statutom i općim aktima Udruženja i izvršavaju druge dužnosti koje im povjere organi Udruženja.

Član 13.

(1) Član Udruženja može u svako doba svojevrijedno istupiti iz Udruženja, ako o tome pismeno obavijesti Predsjedništvo. Kao dan prestanka članstva će se smatrati datum prijema pismene obavijesti.

(2) Član se briše iz evidencije ako ne plati propisanu članarinu dvije uzastopne godine. Odluku o tome donosi Predsjedništvo. Takav član se može ponovo upisati u Udruženje.

(3) Član Udruženja koji grubo krši Statut Udruženja, ne izvršava svoje obaveze prema Udruženju ili svojim postupcima nanosi štetu Udruženju ili narušava ugled Udruženja, može biti isključen iz Udruženja. Prije donošenja odluke o isključenju, član Udruženja mora biti obaviješten o prijedlogu za isključenje, kao i razlozima zbog kojih se predlaže isključenje. U tom slučaju se članu Udruženja ostavlja rok od najmanje mjesec dana za izjašnjenje o pokrenutom prijedlogu za isključenje iz Udruženja. Odluku o isključenju člana donosi Predsjedništvo Udruženja. Protiv odluke Predsjedništva Udruženja, u roku od 30 dana, može se izjaviti pismeni prigovor Skupštini Udruženja. Odluka Skupštine na prigovor je konačna.

(4) Član koji je isključen iz Udruženja zbog razloga navedenih u prethodnom stavu ne može ponovo postati član Udruženja.

Član 14.

Skupština Udruženja može donijeti opći akt kojim će, u skladu s ovim Statutom, bliže urediti način i postupak stupanja u članstvo i prestanak članstva.

Član 15.

(1) Udruženje može biti kolektivnim članom i drugih odgovarajućih domaćih i međunarodnih udruženja i organizacija čija djelatnost je saglasna s ciljevima, odnosno djelatnosti Udruženja, o čemu odluku donosi Predsjedništvo.

(2) Članovi Udruženja mogu biti članovi i drugih odgovarajućih domaćih i međunarodnih udruženja i organizacija.

Član 16.

(1) Udruženje može svojim članovima, naučnim i prosvjetnim radnicima, kao i drugim građanima, udruženjima i ustanovama koje se ističu u naučnom i/ili nastavnom radu, odnosno na unapređenju i promicanju djelatnosti Udruženja dodijeliti posebna priznanja u obliku diplome, pohvale, plakete i zahvalnice.

(2) Odluku o dodjeli priznanja donosi Predsjedništvo.

(3) Udruženje može svojim članovima dodijeliti materijalnu nagradu. Odluku o tome donosi Skupština na prijedlog Predsjedništva.

IV – ORGANIZACIJA UDRUŽENJA

Član 17.

(1) Organi Udruženja su:

- Skupština,
- Predsjedništvo,
- Predsjednik,
- Nadzorni odbor,
- Sud časti.

(2) Mandat svih organa Udruženja traje četiri godine.

Skupština Udruženja

Član 18.

(1) Najviši organ upravljanja Udruženjem je Skupština.

(2) Skupštinu Udruženja čine sve fizičke osobe koje su redovni ili počasni članovi Udruženja i po jedan imenovani predstavnik svake pravne osobe koja je član Udruženja.

(3) Način izbora predstavnika pravne osobe koja je član Udruženja svojim aktom utvrđuje pravna osoba.

Član 19.

(1) Redovne sjednice Skupštine održavaju se najmanje jednom godišnje.

(2) Sjednicu Skupštine saziva i njenim radom rukovodi predsjednik Udruženja.

(3) Predsjednik Udruženja može sazvati vanrednu sjednicu Skupštine na vlastitu inicijativu ili na zahtjev najmanje jedne trećine članova Udruženja, s time da odmah predloži dnevni red.

(4) Ako predsjednik Udruženja ne sazove sjednicu Skupštine na zahtjev predlagača iz prethodnog stava u roku od 30 dana od dana podnošenja zahtjeva, sjednicu će sazvati predlagač. Radom sjednice sazvane na taj način rukovodi najstariji prisutni član Skupštine.

(5) Na vanrednoj sjednici Skupštine se razmatraju samo pitanja zbog kojih je sazvana.

(6) Skupština može pravovaljano odlučivati ako je sjednici prisutno najmanje 10 članova Skupštine.

(7) Pravovaljane odluke se donose natpolovičnom većinom prisutnih članova Skupštine, osim ako ovim Statutom nije drugačije određeno.

(8) Odluke na sjednicama Skupštine se donose javnim glasanjem osim u slučaju kada Skupština odluči da je glasanje tajno.

(9) Skupština o nekim pitanjima može na prijedlog predsjednika, Predsjedništva, Nadzornog odbora ili Suda časti odlučiti i pismenim putem ili putem elektronske pošte. U tom slučaju je za donošenje odluke potrebno da glasa bar 10 članova.

Član 20.

Skupština Udruženja:

- donosi Statut Udruženja, te njegove izmjene i dopune,
- iz reda svojih redovnih članova bira i opoziva predsjednika, Predsjedništvo, Sud časti i Nadzorni odbor,
- donosi Plan rada Udruženja,
- donosi Poslovnik o radu Skupštine,
- donosi Pravilnik o nagradama i priznanjima,
- donosi druge opće akte potrebne za rad Udruženja,
- donosi odluku o imenovanju počasnih članova Udruženja,
- donosi odluku o pripajanju, razdvajanju, transformaciji, raspuštanju i prestanku rada, kao i o drugim statusnim promjenama Udruženja,
- donosi odluku o osnivanju subjekata za privrednu i drugu djelatnost,
- razmatra izvještaje o radu organa Udruženja između dvije sjednice Skupštine,
- odlučuje o nagradama članovima Udruženja,
- razmatra žalbe, prigovore i prijedloge koji su joj upućeni,
- odlučuje i o svim drugim pitanjima koja nisu u nadležnosti drugih organa Udruženja.

Predsjedništvo i predsjednik

Član 21.

(1) Predsjedništvo ima 5 članova koje bira i razrješava Skupština Udruženja.

(2) Sjednice Predsjedništva se održavaju prema potrebi.

(3) Sjednice Predsjedništva zakazuje i njima rukovodi predsjednik Udruženja.

(4) Predsjedništvo može pravovaljano donositi odluke ako je sjednici prisutno više od jedne polovine članova Predsjedništva.

(4) Pravovaljane odluke se donose natpolovičnom većinom prisutnih članova Predsjedništva, osim ako ovim Statutom nije drugačije određeno.

Član 22.

Predsjedništvo:

- priprema sjednice Skupštine i predlaže dnevni red,
- priprema i predlaže nacrt izmjena i dopuna Statuta i drugih akata koje donosi Skupština,
- provodi politiku, zaključke i druge odluke Skupštine,
- upravlja imovinom Udruženja,
- podnosi Skupštini izvještaj o svom radu,
- donosi Poslovnik o radu Predsjedništva,
- donosi operativni plan i program rada Udruženja,
- donosi finansijski plan i izvještaj,
- donosi odluku o adresi sjedišta Udruženja,
- odlučuje o prijemu i isključenju iz članstva u Udruženju,
- odlučuje o dodjeli priznanja,
- predlaže Skupštini nagrade za članove Udruženja,
- odlučuje o sklapanju ugovora o raznim oblicima saradnje i udruživanja sa srodnim udruženjima u zemlji i inostranstvu,
- odlučuje o članstvu Udruženja u odgovarajućim domaćim i međunarodnim udruženjima,
- osniva sekcije Udruženja i imenuje njihove rukovodioce,
- osniva odbore, komisije i druge organe koji pomažu u ostvarivanju ciljeva Udruženja i imenuje njihove rukovodioce i koordinateure,
- imenuje koordinateure za pojedine djelatnosti Udruženja,
- razmatra programe rada sekcija i koordinateura pojedinih djelatnosti, te njihove izvještaje o radu i poslovanju,
- prati rad sekcija, odbora, komisija i drugih organa i odvijanje redovnih i povremenih aktivnosti Udruženja,
- imenuje urednike i članove redakcija glasila i časopisa koje izdaje Udruženje,
- donosi odluku o visini i načinu prikupljanja članarine,
- po potrebi bira predstavnike Udruženja u druge organe, udruženja i organizacije,
- donosi odluke o troškovima službenih putovanja,
- donosi odluke o finansijskim troškovima u svrhu ostvarivanja planiranih ciljeva rada realizacije djelatnosti Udruženja,
- brine se o informiranju članova,
- podržava i ističe kandidaturu Udruženja i članova udruženja za dodjele domaćih i međunarodnih nagrada i priznanja,
- odlučuje o svim drugim pitanjima koja se pojave tokom rada a koja nisu u nadležnosti Skupštine ili drugih organa Udruženja,
- obavlja i druge aktivnosti koje su potrebne radi obavljanja djelatnosti Udruženja, te izvršava i druge zadatke po ovlaštenjima Skupštine i zahtjevima nadležnih organa.

Član 23.

- (1) Član Predsjedništva koji je prestao biti član Udruženja, automatski prestaje biti i član Predsjedništva.
- (2) Skupština može razriješiti članove Predsjedništva i prije isteka vremena na koje su izabrani ako prekorače svoja ovlaštenja ili svoje obaveze na izvršavaju savjesno te time nanose štetu i ruše ugled Udruženja.
- (3) Ukoliko razrješava cijelo Predsjedništvo, Skupština tada bira novo s punim mandatom, a ukoliko razrješava pojedine članove onda nove bira samo na vrijeme do isteka mandata cijelog Predsjedništva.

Član 24.

- (1) Predsjednika bira i razrješava Skupština Udruženja.
- (2) Predsjednik Udruženja zastupa i predstavlja Udruženje i njegove organe.
- (3) Predsjednik Udruženja je ujedno i predsjednik Predsjedništva.
- (4) Predsjednik koordinira sve aktivnosti Udruženja i osigurava pravilan i zakonit rad.
- (5) Predsjednik raspolaže sredstvima na računima Udruženja.
- (6) Predsjednik imenuje dopredsjednika i sekretara iz redova Predsjedništva.
- (7) Predsjednika u slučaju spriječenosti zamjenjuje dopredsjednik, sa svim njegovim pravima i ovlaštenjima utvrđenim Statutom.
- (8) U slučaju spriječenosti Predsjednika dužoj od 6 mjeseci Predsjedništvo iz svojih redova imenuje vršioca dužnosti predsjednika, koji ima sva prava i ovlaštenja predsjednika utvrđena Statutom. Njegova obaveza je da u roku od 30 dana sazove sjednicu Skupštine, kojom i rukovodi, radi provođenja izbora novog predsjednika.

Član 25.

Sekretar:

- pomaže predsjedniku u njegovom radu,
- vodi zapisnike na sjednicama Predsjedništva i Skupštine.
- vodi evidenciju članstva Udruženja,
- vodi i čuva arhivu Udruženja,
- čuva pečat Udruženja,
- obavlja finansijske poslove Udruženja,
- izvještava Predsjedništvo o finansijskom poslovanju,
- pomaže u izradi i vrši nadzor nad izradom finansijskih izvještaja i obračuna,
- obavlja i druge poslove koje mu povjeri predsjednik i/ili su u skladu s odlukama Predsjedništva i Skupštine.

Nadzorni odbor

Član 26.

- (1) Nadzorni odbor ima 3 člana koje bira Skupština Udruženja.
- (2) Članovi Nadzornog odbora između sebe biraju predsjednika. Članovi Nadzornog odbora ne mogu biti istovremeno članovi Predsjedništva Udruženja.

- (3) Prvu sjednicu Nadzornog odbora saziva predsjednik Udruženja, a ostale sjednice saziva i njima rukovodi predsjednik Nadzornog odbora.
- (4) Nadzorni odbor zasjeda u punom sastavu a odluke donosi natpolovičnom većinom glasova.
- (5) Nadzorni odbor kontrolira materijalno – finansijsko poslovanje Udruženja, sprovođenje odluka Predsjedništva Udruženja i o tome informira članstvo i organe Udruženja najmanje jednom godišnje.
- (6) U svom radu Nadzorni odbor saraduje s drugim organima Udruženja.
- (7) Nadzorni odbor donosi Poslovnik o svom radu.
- (8) Nadzorni odbor se sastaje po potrebi.

Sud časti

Član 27.

- (1) Sud časti ima tri člana koje bira i razrješava Skupština Udruženja.
- (2) Članovi Suda časti između sebe biraju predsjednika.
- (3) Prvu sjednicu Suda časti saziva predsjednik Udruženja, a ostale sjednice saziva i njima rukovodi predsjednik Suda časti.
- (4) Sud časti zasjeda u punom sastavu a odluke donosi natpolovičnom većinom glasova.
- (5) Sud časti rješava sporove unutar Udruženja i nadležan je za postupke kojima se utvrđuje da li je član Udruženja počinio bitnu povredu Statuta ili drugih općih akata Udruženja i za izricanje mjera u tom slučaju.
- (6) Ako utvrdi da je član Udruženja počinio bitnu povredu Statuta ili drugih općih akata Udruženja može mu izreći opomenu, javnu opomenu ili predložiti Predsjedništvu isključenje člana iz Udruženja.
- (7) Diskusije i procedure glasanja Suda časti su tajna.
- (8) U svom radu Sud časti saraduje s drugim organima Udruženja.

Član 28.

Skupština Udruženja može donijeti opći akt kojim se bliže uređuju pitanja od značaja za način rada Suda časti i ostvarivanja njegovih nadležnosti, u skladu sa ovim Statutom.

Sekcije i drugi oblici organiziranja

Član 29.

- (1) Članovi Udruženja svoje aktivnosti obavljaju kroz sekcije.
- (2) Udruženje ima sekcije za:
 - nauku i visoko obrazovanje,
 - srednju školu,
 - osnovnu školu,
 - izdavačku djelatnost.
- (3) U slučaju potrebe Predsjedništvo može formirati i druge sekcije.
- (4) Djelokrug rada sekcija Udruženja utvrđuje se posebnim pravilnikom kojeg donosi Predsjedništvo Udruženja.

Član 30.

- (1) Predsjedništvo po potrebi obrazuje i povremene komisije i druga svoja radna tijela.
- (2) Djelokrug, način rada i sastav komisija i drugih radnih tijela regulira se Poslovníkom o radu Predsjedništva Udruženja.
- (3) Radi uspješnijeg i potpunijeg ostvarivanja ciljeva Udruženja, Skupština može na prijedlog Predsjedništva uspostaviti posebne oblike organiziranja.

V – PREDSTAVLJANJE I ZASTUPANJE UDRUŽENJA

Član 31.

- (1) Udruženje predstavlja i zastupa predsjednik Udruženja, a u slučaju njegove spriječenosti osobe imenovane u skladu sa stavovima 7 i 8 člana 24 ovog Statuta.
- (2) Sekcije, komisije, odbore i druga radna tijela predstavljaju i zastupaju lica iz prethodnog stava ili osobe koje ovlaste osobe iz prethodnog stava.

VI – FINANSIRANJE I IMOVINA UDRUŽENJA

Član 32.

Imovinu Udruženja čini:

- članarina,
- dobrovoljni priloz i pokloni fizičkih i pravnih lica,
- donacije, dotacije i sponzorstva,
- sredstva ostavarena učešćem u projektima,
- sredstva ostvarena obavljanjem izdavačke djelatnosti,
- sredstva ostvarena pružanjem intelektualnih usluga kao što su recenzije, stručna mišljenja, analize, i sl.,
- sredstva prikupljena izradom udžbenika, priručnika i drugih didaktičkih materijala, i sl.
- sredstva prikupljena organizacijom takmičenja, skupova, predavanja, savjetovanja, seminara, radionica, ljetnih i zimskih škola, i sl.,
- sredstva prikupljena iz drugih izvora u skladu sa Zakonom.

Član 33.

Sredstva Udruženja mogu se koristiti samo za ostvarivanje programskih ciljeva i djelatnosti Udruženja, a na osnovu programa rada Udruženja i utvrđenih finansijskih planova te pozitivnih zakonskih propisa.

Član 34.

- (1) Članovi Udruženja mogu dobiti naknadu za pokriće efektivnih troškova učinjenih u dogovoru s Predsjedništvom.
- (2) Za obavljanje finansijskih, administrativnih i drugih poslova Udruženje može sklopiti ugovor i/ili angažirati saradnike. Odluku o tome donosi Predsjedništvo.
- (3) Članovima i saradnicima se mogu isplaćivati autorski honorari i honorari za rad na izradi glasila i publikacija. Odluku o tome donosi Predsjedništvo.
- (4) Članovima Udruženja i saradnicima se mogu isplaćivati honorari za predavanja na skupovima, seminarima, predavanjima, savjetovanjima, radionicama, ljetnim i zimskim školama. Odluku o tome donosi Predsjedništvo.
- (5) Članovima Udruženja i saradnicima se mogu isplaćivati honorari za angažman u provođenju takmičenja iz matematike. Odluku o tome donosi Predsjedništvo.

Član 35.

- (1) Sopstvenim prihodom Udruženje samostalno raspolaže preko svog računa na način utvrđen odlukama Predsjedništva Udruženja u skladu sa Zakonom.
- (2) Za obaveze nastale u radu Udruženja i njegovih organa, odgovara Udruženje.

Član 36.

Naloge za utrošak sredstava Udruženja potpisuje predsjednik Udruženja i lica koja imenuje Predsjedništvo.

Član 37.

- (1) Udruženje može imati u vlasništvu pokretnu i nepokretnu imovinu.
- (2) Imovinom u vlasništvu Udruženja upravlja Predsjedništvo.

VII – SARADNJA S DRUGIM UDRUŽENJIMA, ORGANIZACIJAMA I ORGANIMA

Član 38.

- (1) Udruženje može sklapati ugovore o raznim oblicima saradnje i udruživanja sa srodnim udruženjima u zemlji i inostranstvu, o čemu odluku donosi Predsjedništvo.
- (2) Udruženje u ostvarivanju programskih ciljeva saraduje s organizacijama koje imaju iste ili slične ciljeve, državnim, entitetskim, kantonalnim, općinskim i drugim organima, pedagoškim zavodima, školama, fakultetima, univerzitetima, te odgovarajućim naučnim, stručnim i privrednim subjektima.
- (3) Udruženje, u okviru svojih prava i dužnosti, saraduje i razvija odnose sa sličnim organizacijama u drugim državama u skladu s Ustavom, Zakonom i međunarodnim ugovorima.

VIII – PRIPAJANJE, RAZDVAJANJE, TRANSFORMACIJA I PRESTANAK RADA UDRUŽENJA

Član 39.

- (1) Udruženju se može pripojiti drugo udruženje s istim ili sličnim programskim ciljevima.
- (2) Udruženje se može pripojiti drugom udruženju s istim ili sličnim programskim ciljevima.
- (3) Udruženje se može razdvojiti na dva ili više udruženja.
- (4) Udruženje se može transformirati u Udruženje od javnog interesa.

Član 40.

- (1) Odluku o pripajanju, razdvajanju ili transformaciji, na prijedlog Predsjedništva, donosi Skupština Udruženja dvotrećinskom većinom prisutnih članova Skupštine.
- (2) Odlukom iz prethodnog stava se reguliraju sve radnje, ciljevi, prava i definira način podjele imovine i nastalih obaveza, te imenuju osobe koje su nosioci navedenih aktivnosti.

Član 41.

- (1) Udruženje može prestati s radom i postojati dobrovoljno ili po sili Zakona.
- (2) Odluku o dobrovoljnom prestanku rada i postojanja Udruženja donosi Skupština dvotrećinskom većinom svih članova Skupštine.
- (3) Udruženje prestaje da postoji brisanjem iz Registra udruženja.
- (4) U slučaju prestanka postojanja Udruženja, imovinom Udruženja u potpunosti raspolažu osnivači Udruženja.

IX – PRELAZNE I ZAVRŠNE ODREDBE

Član 42.

Tumačenje odredaba ovog Statuta daje Skupština Udruženja.

Član 43.

Izmjene i dopune ovog Statuta donose se po postupku za njegovo donošenje.

Član 44.

Ovaj Statut stupa na snagu danom donošenja.

Bihać, 21.6.2013.
Broj: 1/13

Predsjedavajući osnivačke skupštine

mr. Edin Liđan